



Rede ba Rai Sekretariadu, Fundasaun Haburas, Rua Celestino da Silva,
Farol, Dili- Timor-Leste Email: redebarai@gmail.com Telemovel: +670 7922648

Segundu Submisaun Ministeriu Justisa Republika Demokratika

Timor-Leste

Husi

Rede ba Rai

relasiona ho

Lei Expropriasun

15 Fevereiru 2013

Introdusaun.....	1
Lei ne'e diak liu anterior.....	1
Komentariu artigu ba artigu.....	2
Orgaun kompetente tenke demonstra moris diak.....	2
Expropriasaun desizaun polítika.....	3
Abordagem lensa jéneru iha interesadu.....	4
Konsultasaun tenke garante públiku bele asesu.....	5
Kompensasaun ka indemnizasaun tenke fo ketak-ketak.....	6
Despeju presiza prezensa instituisaun kompetente sira hotu.....	7
Konkluzau.....	8

Introdusaun

Ami apresia revizaun ne'ebé mak halo ona no iha mudansa di'ak liu duke ida inísiu. Maski nune'e nafatin prezisa hadi'ak buat barak atu efetivu duni hodi protégé povu kiak no vulneravel nia direitu asesu ba rai no mós hodi kontinua moris.

Ami fiar maibe lamenta tebes katak konsultasaun Lei ne'e la hala'ó ba públiku tomak, satan Lei Expropriasaun ne'ebe fo podér bot Estadu atu foti ka hasai ema nia direitu ba rai hodi uza ba interese públiku.

Ema ne'ebe mak sei lakon sira nia rai dala barak liu povu kiak no vulneravel sira hanesan, grupu feto sira no labarik, agrikultór sira tanba sira nia moris depende tebes ba rai, no rai sai úniku riku soin mak sira iha. Tanba ne'e Lei Expropriasaun prezisa rona ema barak nia hanoin, ideia sira liu-liu povu sira mak hela iha area rural.

Ami apresia revizaun ne'ebe halo ona mudansa diak liu duke inísiu. Maski nune'e, iha aspetu lubun ida, lei sira-ne'e inkonsistente ho obrigasaun sira ba direitus internasionál no mos kontekstu Timor-Leste nian, no la halo-tuir norma sira ne'ebé mak estabelese ona husi instrumentu direitus umanus nian. Wainhira aspetu krusiál husi projetu nian hirak-ne'e abordadu, lei sira-ne'e sei fó risku hodi agrava liutan dezigualdade, kondisaun moris kiak no laiha rai.

Lei ne'e diak liu anterior

Artigu barak mak halo mudansa, inkorpora hanoin balu husi La'ó Hamutuk no Rede ba Rai iha Submisaun inísiu:

- ✓ Explika detallu no klaru interese públiku
- ✓ Expropriasaun sei halo deit wainhira desizaun mai husi Konsellu Ministru
- ✓ Iha prosesu konsultasaun ida ne'ebe mak atu halo abordagem ba parte hotu no mos sei hatoo fali ba interesadu sira
- ✓ Indemnizasaun tetu iha parte hotu atu halo ema moris diak liu
- ✓ Expropriadu iha direitu atu halo reklamasaun hetan fali rikusoin

Lei Ekspropriasaun prezisa revizaun substansiál hodi kumpri GoTL nia obrigasaun internasionál sira ba direitus umanus nian no salvaguarda hasoru aumentu iha pobreza no insegurasan ai-han nian, no instigasaun ba kondisaun laiha rai iha área rural nian, lakon asesu ba rekursu sira komún no dezartikulasaun sosiál, entre impaktu sekundáriu sira seluk ne'ebé previzível. Projetu lei ne'e la adekua ba sirkunstánsia úniku iha Timor-Leste nian, no partikularmente karakterístikas husi área rural sira, populasaun no padraun sira ba uzu rai nian. Nia la trata ho asuntu fundamentál sira ne'ebé

pertinente ba kbiit no limitasaun sira husi ekpropriasaun nian iha Timor-Leste, partikularmente relasiona ho propriedade komunitária no zonas protesaun komunitária ne'ebé luan liután.

Iha ninia forma atuál nian, lei ne'e iha poténsia atu agrava liñas fallansu sósio-polítika nian no bele hamosu konfliktu. Iha ninia atribuisaun ba protesaun prosedimentu no direitu substantivu projetu lei ne'e dook tebes husi normas ba lei internasionál nian, polítikas husi ajénsia dezvoltimentu internasionál nian no prátika dí'ak sira ne'ebé mak rekoñesidu iha literatura akadémiku nian.

Preokupasaun sira:

Iha risku bot katak lei ne'e loke dalan ba Estadu nia prosesu atu foti rai liu husi prosesu kontra direitus umanus. Iha 2010 ONG Fundasaun Haburas halo konsultasaun iha suku 36 iha distritu 7, no iha konsultasaun ne'e komidade sira tau preokupasaun bot liu 74% kona-ba rai ne'ebé Estadu atu foti. Pur ejemplu sentru oleu pezadu Betanu Estadu foti komidade nia rai sein liu husi konsultasaun no indemnizasaun justu. Projetu hanesan Hera loke estrada atu ba iha portu FDTL nian, Mota Ikun Likisa, oleu pezadu projetu tasi mane sai hanesan ameasa ba komidade nia direitu atu sai parte iha desizaun hotu ne'ebe liga ho sira nia direitu ba rai.

Maski iha Lei ne'e nia laran dezvoltolve mekanizmu atu garante povu nia partisipasaun iha prosesu expropriasaun maibe realidade fo poder bot liu ba estadu atu foti desizaun hodi halo Expropriasaun, duke atu konsidera povu kiak no vulneravel ninia preokupasaun wainhira sira la aseita ho expropriasaun ne'ebe fo impaktu ba sira nia moris subsistensia, sosiál, kulturál, ekologia no ekonomia.

Lei ne'e la tau énfaze wainhira mak bele halo expropriasaun ba rai komunitária nian. Tanba rai iha Timor-Leste 90% rai komunitária no sira nia moris lor-loron depende ba rai ne'e, rai nudar úniku rikusoin ne'ebe sira iha hodi garante ba sira nia gerasaun sira nia moris iha futuru. "Komidade Oecusse se iha futuru estadu foti ami nia rai mak ami sei lakon ami nia oan sira nia futuru" katak rai la-bele sai sasukat ho osan ho dezvoltimentu maibe rai ba povu timor iha ligasaun ne'ebe forte no metin.

Komentariu artigu importante sira

Artigu 1. 4. Konsidera nu'udár utilidade pública

Iha lei ne'e deskreve ona ba sasán utilidade publika maibe la sita katak ninia kualidade bele fo garantia ba povu liu-liu ba comunidade mak hetan expropriasaun. Experiencia hatudu katak infrastrutura balu ne'ebe mak hari ladún kualifikadu no sustentável, ezemplu estrada, sentru edukasaun, edifisiu MSS. Estrada outo estrada husi Suai ba Beasu ne'ebe tau padraun speed (acelera nian) so grupu balu deit mak asesu no uza hanesan kompañia, governu no ema riku, laos povu ne'ebe mak hela iha area rural atu lori nia sasán ba faan iha merkadu sira.

- ✓ Lista kona-bá sasá "utilidade públiku" nian tenki kualifikadu husi rekezitu ida ne'ebé mak uzu partikulár ne'e bele sai nesesáriu ba ema barak nia moris-di'ak hanesan determinadu bazeia ba konsulta públiku nian. Ezemplu, estrada, eskola, ospital no barrajen hotu-hotu lá'os automatikamente kontribui ba ema barak nia moris-di'ak mezmu ne'e destinadu ba utilidade públiku nian. Ezemplu iha Timor-Leste auto estrada mak sei halo husi Suai ba Viqueque.
- ✓ Tanba ne'e tenki ejije ba órgaun kompetente atu demonstra justifikasaun moris-di'ak jenuínu nian ba projetu sira ne'ebé sai motivu ba ekspropriasaun bazeia ba konsulta ne'ebé halo ho benefisiáriu importante no parte interesadu sira seluk kona-bá sira nia prioridade uza ba dezentvolvimentu nian.

Artigu 2. Prinsípiu jeral sira entidade ekspropriante no interveniente sira seluk tan iha prosedimentu no prosesu ba ekspropriasaun iha kompeténsia atu hala'o interese públiku

Maski iha Lei Beins imóveis komunitária nian iha Artigu 27.2 hateten katak Bens imoveis komunitária la bele halo transmisaun ba entidade ka ema seluk, no la bele halo peñor.

La klaru kona-bá liu hosi prosesu saida mak Estadu bele halo ekspropriasaun ba propriedade komunitária nian, se karik prosedimentu ekspropriasaun nian ne'e presiza hamosu duni hodi nune'e Estadu bele uza áreas ne'ebé luan liután iha ZPK nia laran ba finalidade interese públiku nian.

Kazu Supplay Base comunidade Suai Loro iha uma Lisan Balis hateten katak ami la-bele muda uma lisan husi rai Suai Loro tanba nia mak fo kbiit espirituál ba uma lisan kiik sira seluk no liu-liu mai ami ema nia moris iha fiar no ne'e la-bele troka ka muda ho sasán seluk ka fatin seluk.

- ✓ Kestaun hirak-ne'e presiza atu trata momoos iha lei nia laran ho maneira ida ne'ebé mak iha konformidade ho direitus umanus. Tanba ligasaun kolektiva ne'e espesiál no iha dependénsia ba sira nia rai liu-liu comunidade rurál sira ne'ebé mak moris tuir sistemas kostumeiru rai nian, lei ne'e tenki kontein protesau no salvaguarda prosedimentu ne'ebé forte hodi proteje sira husi dezlokamentu no ekspropriasaun no tenke garante sira nia direitu ba partisipasaun iha fot desizaun kona-bá uzu ba sira nia rai no rekursus ba projetu dezentvolvimentu nian.

Artigu 4. Konsekuénsia ekspropriasaun nian

Emá hirak ne'ebé presiza atu sakrifika sira nia rai no uma ba dezenvolvimentu nasaun nian tenki hetan oportunidade atu fahe diretamente benefísiu husi dezenvolvimentu nian. Importante tebes justu ba fahe direta benefísiu nian bainhira ema ka comunidade sira ne'ebé afetadu liu-liu hirak ne'ebé kiak. Esperiénsia iha mundu tomak hatudu katak kuaze kazu hanesan ne'e mak sempre akontese "Konsekuénsia ekspropriasaun nian".

Ezemplu kazu Sentru eletrisidade oleu pezadu iha Betanu, Estrada ba Portu FDTL nian, too agora comunidade sira seidauk hetan asisténsia ka indemnizasaun husi estadu Timor-Leste.

- ✓ Tanba ne'e tenki garante katak parte interesadu sira (ema hirak ne'ebé mak sira nia rai no direitu sai ekspropriadu) presiza tau iha situasaun ida ne'ebé kualidade no equitavel moris nian ida ne'ebé di'ak liu fali duké sira nia situasaun anteriór nian. "Konsekuénsia ekspropriasaun nian" ba ema vulnerável sira, inklui ema sira ne'ebé moris iha kiak nia laran, mak atu hasa'e sira nia kualidade moris nian hodi nune'e sira sei labele tan atu sofre kondisaun moris kiak ka deprivasaun sira seluk hodi goza sira nia direitus umanu.

Artigu 5. Estadu deit mak bele ordena ekspropriasaun.

Maski iha Lei Expropriasaun iha prosedimentu antes atu halo expropriasaun ba rai maibe desizaun sei foti husi Konsellu Ministru liu husi parecer Ministeriu Justisa nian, desizaun sira ne'e politika liu.

Komunidade uma kain 16 iha Betanu, Selihasan fatin refinaria, Beasu fatin LNG nian. Hakarak hatene sa benefísiu mak sira hetan wainhira projetu ne'e hala'o no hafoin hotu saida mak sira sei hetan. Maski Komunidade iha pergunta ba kestaun maibe nafatin prosesu foti rai lao nafatin tanba deit konseptu desenvolvimentu. Tristeza bot liu mak estadu foti rai fo ba investor sira hari uma andar maibe comunidade toba iha lona okos hanesan Timor-Plaza, Brimob. Maski comunidade hakarak hasoru no no husu kona ba sira nia direitu maibe ukun-nain sira la rona.

- ✓ Estadu presiza asegura katak ema ne'ebe mak sei hetan expropriasaun iha oportunidade atu partisipa iha foti desizaun tanba sira nia moris depende tebes ba rai maski kuantidade ema oituan deit maibe la-bele sakrifika fali sira nia moris ba ema barak nia moris diak. Estadu tenta atu hare'e ho kestaun hirak ne'e ho lensa povu kiak no vulneravel nian laos kona ba osan no dezenvolvimentu deit.

Artigu 6. Konseitu interesadu

Dimensaun husi direitu ba rai no rekursu natural ne'ebé eziste iha Timor-Leste tenki rekoñesidu husi lei ne'e. Protesaun no direitu tuir lei ne'e tenki habelar esplísitamente ba direitu informál propriedade nian, inklui direitu uzufritu no asesu nian.

- ✓ Definisoun kona-bá "parte interesadu" tenki inkorpora formas hirak-ne'e ba aranju ba pose nian. Feto sira propensu liu atu hetan tipu sira ba direitu informál propriedade nian hirak-ne'e. Uainhira protesaun sira-ne'e habelar ba grupu sira ne'ebé atualmente goza hela direitu ho tipu hirak-ne'e, ema barak ne'ebé mak depende ba rai ka rekursu natural sira seluk no mós rikusoin sira ne'ebé mak sai sujeitu ba ekspropriasaun, maibé sira lá'os na'in, sei sai vulnerável ba kondisaun moris kiak no sai vulneravel liu, afeta sira nia direitu ba qualidade moris nian ida ne'ebé adekuaudu, inklui hela-fatin no ai-han, entre sira seluk. Ema sira ne'ebé, kiak no vulneravel liu iha direitu ba asesu no uzu nian, tenki hetan direitu tuir lei ida-ne'e korrespondente ho propriedade rejistadu direitu nian no refléta ba valór ekonómiku, sosiál no kulturál ba direitu partikulár ne'ebé mak goza tiha ona.

Artigu 12.g. Karik iha hatan hamutuk hosi ekspropriante no ema ne'ebé atu hetan ekspropriasaun, fo forma ba akordu ne'e liu hosi eskritura públiku.

- ✓ Iha akordu ho rekizitu sira lei internasionál nian no padraun sira husi ajénsia dezvoltamentu internasionál nian, lei ne'e tenki kontein obrigasaun sira ne'ebé forte ba iha governu atu esplora, liu hosi avaliasaun ne'ebé vigorozu, desenvolve alternativa hotu-hotu ne'ebé viável ba projetu hodi evita, bainhira posível, ka minimiza ekspropriasaun no dezlokamentu.

Artigu 13.1. Atu halo projetu sira ne'ebé implika ekspropriasaun ba bem imóvel privadu ka komunitáriu nian, tenke hahú ho konsulta públika ba projetu.

Experiensia hatudu katak konsultasaun ne'ebe mak halo husi Governu kona ba Projetu Tasi Mane iha Suai, Betanu No beasu maibe komidade rasik ladún iha informasaun naton kona-ba impaktu sira antes, durante no depois projetu tasi mane. Maski Governu halo konsultasaun ho komidade iha Suai maibe wainhira La'o Hamutuk konfirma ho komidade sira nia rai mak atu hetan expropriasaun sira rasik la dun iha informasaun natoon kona ba projetu ne'e no mos ninia impaktu sira.

- ✓ Lei ne'e tenki adopta protesaun prosedural ne'ebé forte liután hodi garante konsultasaun sira ne'ebé signifikativu. Ezemplu, prosesu no meiu sira ne'ebé mak uza hodi halo audiénsia tenki asesível no introduza liu hosi divulgasaun ba notifikasaun no informasaun kona-bá audiénsia ne'e ba públiku liu hosi kanál sira ne'ebé adekuaudu. Tenki foti medidas espesial hodi asegura katak feto sira bele iha asesu ba audiénsia públiku no iha oportunidade ne'ebé luan liután atu hato'o sira nia opiniaun. Tenki rekezita estratejia konsultasaun hare husi lensa jéneru nian. Tenki fo informasaun ho lian mak populasaun maioria kompriende liu-liu sira ne'ebé mak sei afeta direktamente husi projetu ne'e nu'udár rezultadu husi ekspropriasaun. Explika objetivu, dezeñu, justifikasaun interese públiku no impaktu sekundáriu potenciál sira husi projetu ne'e ba iha grupu dezagregadu sira, tenki deskreve ba públiku tantu iha forma ida eskrita ka verbál nian no mos halo garvasaun video.

Artigu 17. Auto ba vistoria

Rai iha Timor-Leste 90% rai komunitaria no povu iha area rural rai mak úniku riku soin ne'ebe sira iha tanba fo hela fatin, ai-han, moris sósiu-kultural, ekologia no ekonomia.

- ✓ Tanba ne'e avaliasaun kona-bá impaktu ba moris sosiál-kultural, ambientál no ekonomia nian ne'e tenki obrigatóriu ba projetu hotu-hotu. Pertinente liu-liu ba lei ida-ne'e, tenki hala'o avaliasaun komprensivu ida ba despeju no dezlokamentu nian ho dadus dezagregadu. Tenki tau iha konsiderasaun kona-bá impaktu sosiál, kulturál no ekonomia tomak ba iha ema no comunidades ne'ebé afetadu. Ida-ne'e inklui kustu kona-bá danu tantu kapitál, rai, rikusoin no rekursu sira seluk no sosiál nian (parentesku, rede, koñesimentu no matenek lokál, oportunidades no rekursus ne'ebé bazeia ba lokal). Rezultadu husi avaliasaun impaktu nian ne'e tenki apresenta ba públiku no disponivel ba asesu públiku nian. Determinasaun finál ba valór interese públiku husi projetu ne'ebé propoin, katak de faktu karik ida-ne'e sei bele kontinua, tenki tau konsiderasaun ba avaliasaun impaktu ba despeju no wainhira dezloka nian nune'e mós impaktu sosiál no ambientál. Termu kona-bá ekspropriasau, la limite ba kálkulu ba indemnizasaun ne'ebé justu, tenki bazeia ba avaliasaun impaktu ba despeju no dezlokamentu nian, ho hanoin ida atu garante tomak direitus umanus no hadi'ak kualidade moris husi ema sira ne'ebé afetadu. Impaktu ba ema sira ne'ebé ho direitus (informál propriedade) ba uzu no asesu ba rai nian ne'e tenki inklui iha avaliasaun nia laran. Tenki fó atensaun especial ba diferensia impaktu ba iha feto no labarik sira no mós ba iha grupu sira ne'ebé vulnerável no marjinalizadu.
- ✓ Medidas hodi garante katak prosesu devidu relasiona ho inspesaun, ne'ebé estabeselese kona-bá montante husi kompensasaun ne'ebé mak oferese ba parte interesadu tenki konsagra iha lei ne'e nia laran. Inspesaun ne'e tenki hala'o hodi uza metodolojia ne'ebé partisipativu, hodi asegura katak feto sira hetan oportunidade ida ne'ebé significativu atu partisipa. Salvaguarda ne'e nesesáriu hodi garante sasukat no avaliasaun ne'ebé loloos ne'e hetan duni akordu husi parte interesadu. Distorsaun iha sasukat hirak-ne'e geral liu iha prátika ekspropriasuan nian, tantu tanba kapasidade ne'ebé limitadu no mos korrupsaun, prezisa salvaguarda - especialmente direitu partisipasaun significativu ida ne'ebé garantidu - tenki estabesidu iha lei ne'e nia laran.

Artigu 19. Indemnizasaun ne'ebé justu

Indemnizasaunm sei tuir folin merkadu ne'e fraku tebes ba folin imóvel husi propriedade ida-idak (ka titular direitu sira seluk nian), liuliu iha kontestu Timor-Leste nian rai iha funsaun sosiál no kulturál ida ne'ebé forte tebes iha adisaun ba ida ne'ebé ekonómiku.

- ✓ Tenki tau liu konsiderasaun ba avaliasaun ba sasán nian duké bazeia valor merkadu, valor ne'ebe fo ba ema sira mak hetan expropriasau atu nune'e sira bele hadia duni sira nia situasaun nu'udár rezultadu husi ekspropriasau nian. Ida-ne'e sei muda Pensamentu ida garante katak ema hirak ne'ebé mak muda sai hodi fó fatin ba projetu "utilidade públiku" ne'e hetan duni benefísiu direta.

- ✓ Kálkulu ba “indemnizasaun justu” tenki bazeia ba avaliasaun impaktu ida ne’ebé klean no bazeia ba elementu sira tuir mai ne’e:
 - a. Valór husi rai no rikusoin sira hotu hodi mellora nesesidade ba imdemnizasaun bazeia ba rai envés financeira ba ema hirak ne’ebé mak ninia moris depende ba rai;
 - b. Kustu transasionál no tranzitóriu tomak;
 - c. Kustu inkorrente ruma ne’ebé aplikável hodi troka fali rai ne’ebé lakon ka rikusoin ne’ebe lakon hodi hadiak liu tan;
 - d. Valór husi prejuízu ne’ebé hamosu husi interrupsaun ba atividade produtividade nian (hanesan perda iha rendimentu ka produktu subsisténsia/sustentu nian) to’o bainhira bele restaura hikas (sei selu nu’udár pagamentu adiantamentu no pagamentu regulár to’o hetan restaurasaun);
 - e. Kompensasaun adekuaudu ba prejuízu iha sasán no fatin kulturál/kostumeira nian, hodi nota katak ida-ne’e esepialmente kompleksu no sensitivu no tenki bazeia ba nosaun ida ne’ebé kulturalmente adekuaudu iha “valor substituisaun”;
 - f. Pagamentu ida atu garante katak ema sira ne’ebé afetadu benefisia diretamente husi iniciativa dezvoltamentu nian, bainhira viável liuhosi planu kontinuaudu ida ba distribuisaun reseita projetu nian.

Artigu 29. Atribuisáun indemnizasaun

Bebeik fetu la-dun hetan benefísiu husi uza rekursu natural ne’ebe iha. Tanba mane mak iha podér bot atu simu kompensasaun ka indemnizasaun maski fetu foti responsabilidade bot liu hanesan maneija ekonomia uma laran, tau matan ba nesidade labarik, nesidade oan nian iha edukasaun, saude nsst.

- ✓ Kompensasaun tenki seluk keta-ketak ba parte interesadu ida-idak iha termu ne’ebé justu eseptu iha akordu universál ba pagamentu globál. Rejime distribuisaun ba kompensasaun globál nian sei fó kontrolu ne’ebé barak liu ba ema sira ne’ebé kaer podér, normalmente mane sira.
- ✓ Tenki halo esforsu ba fetu sira atu hetan nível kontrolu ida ne’ebé hanesan ba iha pagamentu ba kompensasaun nian no métodu distribuisaun nian. Fetu no mane sira tenki sai hotu benefisiáriu ba pakote indemnizasaun no kompensasaun. Uma-kain sira ne’ebé xefia husi fetu sira, inklui fetu solteira no fetu-faluk sira, tenki iha direitu ba sira nia kompensasaun rasik.

Artigu 39. Rekizitu sira molok foti pose administrativu

- ✓ Lei ne’e tenki garante katak aktus ba expropriasaun/despeju nian sei la rezulta iha ema sira ne’ebé afetadu sai vulnerável ba violasaun ba sira nia direitu atu hetan kualidade moris nian ne’ebé adekuaudu, inklui hela-fatin ka hahán, ka direitus umanu seluk ruma.

Atu salvaguarda hasoru violasaun direitus umanu nian, lei internasionál nian ezije atu aplika protesau sira ne’ebé rigorozu durante aktu ba despeju nian ida tuir ne’ebé kontempla iha

artigu 39 ida-ne'e. protesau hirak-ne'e tenki integradu ba iha lei nia laran tanba nia fó baze legál ida atu hala'o despeju ida. Protesau sira ne'ebé mak previstu ona iha Matadalan Báziku Nasoens Unidas nian kona-bá Despeju no Dezlokamentu ne'ebé bazeadu ba Dezenvolvimentu mak:

- ✓ Prezensa obrigatóriu husi ofisiál governu nian ka sira nia representantes iha lokál durante despeju. Ofisiál governu nian sira, sira nia representantes no ema sira ne'ebé mak implementa despeju ne'e tenki apresenta sira nia an ba ema sira ne'ebé mak hetan despeju no hatudu autorizasaun formál ba asaun despeju ne'e.
- ✓ Observadór sira ne'ebé neutru, inklui observadór rejionál no internasionál sira, sei hetan asesu tuir pedidu, hodi garante transparénsia no konformidade ho prinsípius direitus umanus internasionál nian durante hala'o despeju ruma.
- ✓ Despeju sei labele halo iha forma ida ne'ebé mak viola ema sira ne'ebé afetadu ne'e nia dignidade no direitus umanus ba moris no seguransa nian. Estadu sira mós tenki foti medidas hodi asegura katak feto sira sei la sai sujeitu ba violénsia bazeia ba jéneru no diskriminasaun durante despeju, no mós katak labarik sira nia direitus umanus hetan protesau.
- ✓ Uzu legál ba forsa nian ne'e tenki respeita prinsípiu sira kona-bá nesesidade no proporsionalidade nian, nune'e mós Prinsípius Báziku kona-bá Uzu ba Forsa no Kilat husi Autoridades Aplikasaun Lei nian no kódigu konduta nasional ka lokál nian ruma ne'ebé konsistente ho padraun internasionál sira ba aplikasaun lei no direitus umanus nian.
- ✓ Despeju sei labele halo iha tempu aat nia laran, iha tempu kalan, durante festival ka feriadus relijioza nian, molok ba eleisaun, ka durante ka iha tempu ne'ebé besik ba períodu ezame eskolár nian.
- ✓ Estadus no sira nia agentes tenki foti medidas hodi asegura katak laiha ema ruma mak sai sujeitu ba atakes ka aktus violénsia direta ka indiskriminadu sira seluk, liuliu hasoru feto no labarik sira, ka arbitrariamente haketak husi sira nia propriedade ka bens nu'udár rezultadu husi demolisaun, sunu no formas seluk husi destruisaun deliberada, negligénsia ka forma ruma husi punisaun kolektiva nian. Propriedade no bens sira ne'ebé husik hela ho involuntariamente tenki protejidu hasoru destruisaun no apropiasaun, okupasaun ka utilizaun arbitraria no ilegal nian.
- ✓ Autoridades ka sira nia agentes nunca bele ezije ka obriga ema sira ne'ebé hetan despeju atu sobu sira nia uma hela-fatin ka estrutura sira seluk. Opsaun atu halo ida-ne'e tenki fornésidu ba ema sira ne'ebé afetadu, nu entantu, tanba ida-ne'e sei fasilita rekupersaun ba sasán no

materiál konstrusaun.

Konkluzau

Ami hato'o obrigada wain ba Ministru Justisa Dinisio Babo ne'ebé realiza konsultasaun ba-daruak antes atu haruka fali Lei ba Rai 3 ba iha Konsellu Ministru. Ami hein katak iha possibilidade atu hadi'a iha ezbosu Lei ba Rai 3 ne'e antes atu hatama ba iha Konsellu Ministru.

Beibeik, hanesan Rede ba Rai apresia tebes konsiderasaun mai ami nia ideia sira. Ami sente ksolok se wainhira bele hasoru ka bele responde ba pergunta ruma relasiona ho ne'e. Ami nafatin kontinua involve iha prosesu dezenvolve kuadru legal iha Timor-Leste, atu bele protégé estadu ida ne'e, se wainhira ne'e prodús ba lei ke bele protégé povu nia direitu liu-liu ba grupu kiak no vulneravel sira hanesan feto, labarik, agrikultór.

Obrigada wain bele konsidera ami nia hanoin sira ne'e, ami prontu atu fahe hanoin sira hamutuk ho ita bot sira se wainhira iha pergunta ruma iha futuru.

Ami saran lia

Ines Martins
+670 7725 8724

Feliciano da Costa de Araujo
+670 7786 9079

Membru Rede ba Rai ba